



Al tayimtsü engine yanglushitsü
metetdaksür liasü

Arsenal aser Martin
tenangzüktepba yangluogo



AIR INDIA

Gol-i Naga yimtenren bentetba nung tali rangloksüla: NSCN/GPRN

Dimapur, Chiteni/July 06 (TYO): Osang kaket nung "Absconder under PMLA case" ta sür osang ka adokba dak sendakba nung NSCN/GPRN ajanga sangdong ka agüja liasü.

Iba ken o ya 2017 küm atalokba dak sendakba lir, kong 34 Assam Rifles temi Karong, Manipur anasa Mobile Vehicle checkpoint ka amenoka aliba nung Taga, Myanmar nung kibong kumer küm 25 ajungba nung amshitsü sen apu, ta NSCN/GPRN indang Ministry of Information and Publicity (MIP) ajanga ashi.

Indian security forces temi iba sen Manipur Police nem agütsü aser iba sülen Chief Judicial Magistrate, Senapati indang court nung ken o ka benok aser sen aruba lenmangtem dak sendakba nungdakba documents ajunga court nem agütsü aser court ajanga inyakyim shidak amshia May 9, 2017 nü Cril. Misc (Zima) case no 10 of 2017 Ref. FIR NO. 8(4) SPT P.S. U/S 17UA(P) Act nung obendang agüja tai tonglokja alir medentsü aser apuba sen meyipa agütsü, ta sangdong ajanga ashi.

Gen. Niki Sumi ya kodanga

sen bener mapu, anungji Government of India dang Gen. Niki Sumi ya 'money laundering' ken o koba nung shilem agia lir ta asüngdangner, ta NSCN/GPRN sangdong ajanga ashi.

Alima nung democracy tulutiba aser 'emerging global power' ta pei sasa asükuma jembiba linük kati Indo-Naga political issue bentettsü asoshi temulung agüja aser nendaka inyaksü melen yimjak nung Naga lenir tenüng menüksütsü asoshi agency balala amshiba, kinungertem merenshiba aser osang tiazü prokshiba amala samesa mapa inyaksü nüburtemi imlaa meliasü, ta ashi.

Tashiyim yimya amshia Naga nung yimten temeden raksatsütsü tebilemba alinungbo, Government of India-i yimjung maparen asoshi NSCN/GPRN kodanga mejaoktsüla jaok.

GoI ajanga ashikülak yimya balala amshiba ajanga Naga nung yimten temeden kodanga manokshitsütsü, koba puti otsü tamendak dak akang-akanga lir, ta NSCN/GPRN sangdong ajanga ashi.

SMART Policing atema RRU aser Nagaland Police lungjemer

Dimapur, Chiteni/July 06 (TYO): Advanced training, research aser sentong balala ajanga SMART policing jenjang tajungbai ajungkettsü asoshi bendanga agütsür inyakba nung akangshia Rashtriya Raksha University (RRU) aser Nagaland Police tsüngta tezüngzüktep ka agiogo.

Northeast Region tajungba kumdaksütsü asoshi tongtipang mera ka agia tan hopta Memorandum of Understanding (MoU) ka online ajanga zülutepa liasü.

Nagaland Police tenüng nung Rupin Sharma, IPS, DGP; Sandeep Tamgadge, ADG (Law & Order); R. Kikon, ADG (Adm); aser R. Tetseo, IPS, IG (TRAINING) nungertemi shilem agia liasü.

Technology balala yanglutsü, academic tsütsü külemi inyaksü aser Northeast region nung nungdakba ama projects tem yanglua mapa kuma külemi inyaksü asoshi iba tezüngzüktep nung shia lir.

Nagaland Police ketdangsürtemi ozüng balala

mapa kuma amshiba nung tetsükdaksü ajuruba ajangtetsü asoshi nungdakba skills aser shisatsü agütsütsüsa yangluba training programs tem RRU ajanga agütsütsü.

RRU aser Nagaland Police külemi mera agiba ya ozüng tem mapa kuma inyakba aser amshiba aser Northeast region tekumkumba kumdaksütsü asoshi tongtipang mera ka alitsü.

RRU aser Nagaland Police lungjemer Advanced Training, Research and Innovation, Technology Integration aser Northeast-Focused Projects amala inyakyim nungrangloksü.

Nungdakba training aser sendakba inyakyim ajunga sorkari scheme kübok inyaksü.

Rupin Sharma, IPS, Director General of Police (DGP), Nagaland ajanga iba partnership pela agizükba mapang, iba MoU ajanga jenjang tulu akaba teyari agütsütsü aser police ketdangsürtem SMART officers akumtsü, ta ashi.

Iba ya ajanga Nagaland Police Force indang tashi ulushitsü, ta paisa ashi.



Dimapur, July 6, 2025 : Anogo ana-asem tzünglu kanga sashia aruba ajanga Dimapur yimti kübok Nagarjan Police point anasa aser Vilhume Colony nung tzü metsünga aliba noksa nung angur. Dimapur yimti nung kiyong aika kanga mejungi tzü metsüng agi kongshia lir.

Mapameinyakba cooperatives tem shibangtsütsü: Akangjongshi

Kohima, Chiteni/July 06 (TYO): Nagaland indang cooperative ecosystem tashi itshidaksütsü atema tongtipang mera ka ama, Department of Cooperation ajanga October 2025 tashinung mapa meinyakba cooperative society 3,000 shi indang registration agientsütsü, ta Deputy Registrar, Cooperative Society, Akangjongshi-i sangdong.

Kohima nung Honibarnü International Cooperation Day amungdang, Nagaland nung registered cooperative societies 8,000 dak tema liaka shilem 73 jungnüa inyaksangshi kecha mali mesüra mapa meinyaker, koba ajanga sector inyakyim nung timtem jenti ajuru, ta Akangjongshi-i ashi.

"Onoki October ita tashinung item mapa meinyakba society indang registration agenja inyakyim bentettsü nükjidong lir," ta pai ashi.

2021 küm Union Ministry of Cooperation lapokba sülen central sorkari mangdang tulu yur digitisation initiatives tenzük, ta pai ashi.

National Cooperative Database (NCD) portal yagi primary nungi multi-state levels tashi cooperative societies ajunga indang data ka kuma lungjemdaksür,

anungji stakeholders aser policymakers temi osang tejangja mela-mela agiteter.

Primary Agricultural Credit Societies (PACS) computerisation asüba nükjidong ya data management, transparency aser audit standards tajungba kumdaksütsü nükjidong nung lir, ta pai ashi.

ERCS (e-Registrar of Cooperative Societies) platform tenzükba ya paper mamshitsü, digital ecosystem asoshi lir aser society temi district offices tonga moaka online ajanga registration asoshi apply süteter, ta ashi.

Item modernisation inyakyim nung takok anguba nung intensive capacity-building programmes nungdaker, ta Deputy Registrar ajanga ashi.

Tesüiba ita trok tsüngta department-i cooperative societies aser departmental staff tem asoshi training sentong balala ayongzüka agiogo, aser ibaji ajanga operational efficiency aser technical skills kanga tajungba kumdaksü.

Temelenshi tulu kaji akhi mapang amshiba PACS nungi Multi-Purpose PACS (MPACS) dangi melenba ya lir. State nung model by-laws tasen amshi tenzükogo aser 2025 küm tatem tashinung targeted rural areas shilem 50

awajemtsü nükjidong lir ta ashi.

Registration costs aser by-law expenses ya NABARD ajanga senotsü teyari agütsüba nungi Nagaland State Cooperative Bank ajanga agütsütsü.

Yimdaklir tem district offices tonga moi registration maparen renemba nung yimdaklir yaritsü asoshi resource personnel tem yoktsü, ta Akangjongshi-i ashi.

International Year of Cooperatives den lirumedemka, department-ia state tesem ajunga nung plantation drives ayongzüka Forest Department teyari nung district shia süngdong 500 dak tema temogo. Nagaland House, New Delhi nunga süngdong atemba sentong ka ayongzüka liasü.

Government of India-i 2047 tashinung Viksit Bharat akumtsü mangdang yua aliba nung takok angutsü asoshi cooperative sector ya tongtipang lir. "India nung yimdak-yimtsüng temelenshi aser lenla ajaklen aintsü asoshi tarutsü nükla ya cooperative base tashi aitba nung amendaka lir," ta pai ashi.

Paisa departments, stakeholders aser nüburtem dang iba movement nung shilem agia yariteptsü ayongzüka liasü.

Indian army recruitment outreach sentong agi



Dimapur, Chiteni/July 6 (TYO): Indian Army Recruitment Office (ARO), Rangapahar-i July 5 nü Patkai Christian College, Chumukedima nung Combined Annual Training Camp (CATC)-59 akaba mapang Officers aser Agniveer densema Indian Army kübok category balala nung züngoksemsü atema jenjang tajungba kümdaktsütsü nükjidong nung mera aoba sentong ka ayongzüka agiogo.

Iba sentong ya 1 Nagaland Air Squadron National Cadet Corps (NCC), Dimapur den longjemer agia liasü. Iba sentong nung NCC cadet 346-i shilem agia liasü.

Sentong agiba mapang

Agnipath Scheme, login procedures, registration atema login ID koda yanglutsü, 2025-26 atema recruitment notification, tajangzükttem, küm pezü sülen maongkatem indang metetdaktsüba den mangatetba ken o tem jangjashija liasü.

Officer entry scheme tem nung National Defence Academy (NDA), Indian Military Academy (IMA), Officers Training Academy (OTA), Military Nursing Services (MNS) aser Territorial Army (TA) den Service Selection Board (SSB) interviews tem densema lir aser item indang metetdakja liasü.

Army nung adentsü jangraratem dang scheme ajak atema eligibility criteria,

application inyakyim aser shimshiba inyakyimtem indang metetdaktsü aser talisa 2025-2026 atema recruitment notification indang metetdakja liasü.

Parnok nemsä Army organisation aser Arms aser Services tapu balala indang metetdakja liasü. Maneni handouts, posters, pamphlets aser tanga publicity osettem lemtsüogo.

Director Recruiting-i, Wing Commander M Herojit Singh, CO, 1 Nagaland Air Sqn NCC, Dimapur den sensak asem aser 2025-26 küm atema recruitment notification melenshiba densema Indian Army nung entry balala indang osang tejangja agüja liasü.

Niuland Deputy Commisioner-i tekümdangtsü kar metetdaktsü

Dimapur, Chiteni/July 6 (TYO): Taoba anogo ishika tzünglu kanga sashia aruba dak sendakba nung nüburtem kümzüka alitsü atema Niuland DC-i tetuyuba kar agütsüogo.

1. Niuland district kübok ayong aser ayongnutem nung ango khenyongi maputsü

2. Ayong küm nung südosünema kazütepba aser nüngdakba makaba maprentem benoka inyakba ajak tenokdangba agütsüogo, kechiyong ayong nung tzüshi alua aponer aotsü ana nung lir aser ayong nung tzü aika küma yimdar.

3. Ayongküm nung alirtem aser lenden nung alirtem dang tzü tali metsünga atura tenem nung tekümkzüba tesem bushia aotsü metetdaktsüogo.

4. Tzü tali yima aliba ayongtem nung ango maputsü merangang, kechiyong ibala inyakyim ajanga nisung ka arakseta asütsü aser lendongi

aitsü ana nung toktsür.

5. Tzümet süng agi kongshir aliba tesemtem nung tzü dak sendakba tashidaktem poktettsü akok, anungji jelia iba tashidak nungi jenboa alitsü asoshi jenjang agitsüla.

Tzünglu kanga sashia aruba aser tzümet süng aruba ajanga nisung, kiset shiruru aser kiojentem lendong nung toktsür. Anungji lisopur ajak dang tetuyuba sülen anidaktsü aser nisung asüba mesüra kiojen raksaba kar danga atalokra ketdangsürtem nem metetdaktsütsü osang agütsüogo.

Jongkdak mapang item number tem den tongteprateptetsü:

State Emergency Operation Centre : 1070 (Toll free number) 0370-2291120/22 | State Disaster Response Force (SDRF) 9366819486/7005806182 || DDMA, Niuland: 7005047510.

Scholarship indang metetdaktsü

Dimapur, Chiteni/July 6 (TYO): ST kaketshirtem atema CSS-Post Matric Scholarship guidelines yanglushir aliba dak ajemdaker iba scheme benoka inyakba agency department of Higher Education-i sangdong ka ajanga nüburtem aser kaketshirtem dang, guideline P-12, Sl. No. 6. Note 1: kong "Self-declarations or affidavits of self-assessment of income shall not be accepted" ta shia lir iba indang metetdaktsüogo.

Anungji Academic Session 2025-26 nungi tenzüka Department-i Funding Agency indang iba guideline sülen ajang ajanga anidaktsü, koba

Directorate indang website nung angutsü.

Maneni income declaration indang captionk ji "FAMILY INCOME CERTIFICATE" ta asütsüla. ken o dak sendaka alir ajak dang iba temelenshi ya temulungdang ayutsü metetdaktsüogo. State sorkari agizüker aliba osang ya Directorate indang w e b s i t e : www.highereducation.nagaland.gov.in nung angutsü.

Iba tetuyuba sülen manokdakertem indang application magizükttsü, ta kasa sangdong ajanga metetdaktsü.

Dzu ayong nung mejangjaba nisung teret ka nguteta lir

Dimapur, Chiteni/July 6 (TYO): July 5 nü nikongtsütsü 5 ako shi nung Dzu ayonglanglen Zero Point nung Chedema anasa mejangjaba nisung ka teret nguteta lir, ta ketdangsür sangdong ka ajanga metetdaktsü.

Inyakyim dak ajemdaker teret ya shia aruogo. Kanga junga bushisüngdangba den post-mortem examination ka agiba sülen teret ya arishi küm 25 nungi 30 tsüngda aliba tetsür ka indang asütsü ta jangjaogo.

Temzüng özüng kübok tinyaktsü maparen ajak tembanga inyakogo. Teret ya tang North Police Station, Kohima indang morgue nung yua lir aser maitsü jangjatsü merangdar.

Iba dak sendakba nung Kohima Police-i nüburtem dang teyari meshiogo. Kija aser kibong kari danga nisung samaba indang aser talisa

Chedema aser Dzu ayong temeket nung samaba indang osang agütsür lira aser parnoki bushiba nisung asütsü ta bilemra tejakdangi arutsü mepeshia metetdaktsüogo.

Karidanga ken o dak sendakba nung osang kar danga meteta lira parnok dang North Police Station, Kohima den iba number: 7005986018 ajanga tongteprateptsü mepeshia metetdaktsüogo.

Maneni nisung samaba indang osang kar danga meteta lira, nisungba ya kodang sama, terparngtsü koma aser tatemsä kong angu ibala mesükba osang metetdaktsütsü mepeshia metetdaktsüogo. Nüburtemi teyari agütsüba ajanga ketdangsürtem nem asür maitsü jangjatsü atema teyari agütsütsü aser kinungertem nem agütsütetsü, ta kasa sangdong ajanga metetdaktsü.

ADC Office & Hr. Secondary block semzükogo



Dimapur, Chiteni/July 6 (TYO): Tawa yangluba Additional Deputy Commissioner's Office Complex aser Government Higher Secondary School (GHSS), Tening Higher Secondary Block semzükba sentong July 3 nü Town Hall nung agiogo.

Iba sentong nung CAWD & Taxes, Kudecho Khamo aser MLA, Namri Nchang mejeta jaoker aser tetushi tejaoker liasü.

Sentong nungsa ketdangsürtem aser jila nung alirtemi shilem agia liasü. Advisor, Kudecho Khamo-i ki anaprongla semzükja liasü, koba Tening subdivision atema alizüng tasen ka tongtetba asütsü.

Sentong nung o jembiba mapang Khamo-i, kitem semzükttsütsü atema pa nem maongka agütsüba atema kanga pelaba lemsatet. Paisa, senso tajungtem dang sorkar meyong kiojentem ya meraketa amshitsü ajungshiba den, Tening tebor ajungba aser terenlok asoshi lenmang sadema lapoka aliba indang jembia liasü.

Paisa, sorkar mapa dak dang metaloker malitsü ajungshiba den, tangbo yimsüsüba nung ochishibaji teyongtsü lir aser nüburtemi lenla ajak nung temaba jenjang tongtettsü atema merangtsüla, ta shisem.

Kasa mapang nung MLA, Namri Nchang-i, administrative

aser educational infrastructure jenjang ajungketja iba tesem terenlok atema jenjang agiba atema sorkar dang kanga pelaba lemsatet.

Paisa, iba terenlok sülen lenmanga tajungba küma yanglutsü imlaba lemsatet, koba mapang talangka sentoka aruogo. Pai ashiba agi, lenmang tajungba küma yanglutsüba ajanga nüburtemi mapang talangka nungi yongya aliba nükjidong ataloktsüba dang masü saka iba ajanga senzäsenpong nung mapang tajemba kümdakja rongsenketzüng terenlok

nunga teyari agütsütsü aser kidanger jila aser yimtem den tajungba sendakteptsütsü.

Sentong nung Peren Deputy Commissioner Hiazu Meru aser Assistant Chief Engineer (CAWD), Er. Sungtiba Amer natia o jembia liasü.

Maneni sentong nung Rev. Kamwang Rentta-i Tsüngrem temoatsü meshizüka sarasadem aser ADC Tening, K. Furhesie Nyuwi-i lokti pela agizükba o jembia liasü. Sentong nungsa GHSS, Tening Vice Principal Rosca Jimo-i tepela o jembia.

Dimapur nung Job Fair ayonger

Dimapur, Chiteni/July 6 (TYO): Dimapur nung July 25 nü job fair tulu ka agitsü. Iba fair ya Dimapur hospital, Purana Bazaar anasa Eagle Crest Institute, East Dimapur Campus nung agitsü.

Iba fair ya lanurtem nem parnok career asoshi lenmang balala bushitsü aser employer den sendakteptsü atema

maongka agütsütsü asoshi Eagle Crest Institute-i ayongzükbä lir. Educated aser

Lanur tejangrartem ajak iba sentong nung dena maongkatem agitsü ayongzükgogo. Osang tejangjaba agitsü aser züngoksemsü atema www.ectaac.com semdangtsü mepeshia metetdaktsüogo.

NSCN/GPRN (Niki) züngsem ka anentsü

Dimapur, Chiteni/July 6 (TYO): NSCN/GPRN Nikk teloki July 3 2025 nü nungi parnok züngsem Johapu Chishi mapa nungi anentsüba sangdongogo, shiba NSCN/GPRN Under Secretary liasü. Cabinet Secretary office sangdong ka ajanga ashiba agi, Johapu ya kidang timtem aliba ajanga mapa nungi anentsüogo. NSCN/GPRN-i pa tarutsü takok nung aotsü imlaja ataba den pai Naga nunger ososhi bendanga agüja inyakba atema kanga pelaba lemsatetpogo.

Lakh aikati vote magütsütettsü: ADR

New Delhi, Chiteni/July 06 (Agencies): Bihar nung assembly election agitsü atema ita ishika dang lia Bihar electoral rolls atema Election Commission-i benokba special intensive revision (SIR) anema ADR-i Supreme Court nung ken o ka benokogo.

Association for Democratic Reforms (ADR)-i Supreme Court dang, iba telemtetba ya mapang telatetba kecha makai kanga aritepa agiogo, anungji iba ya ajanga state nung nisung lakh aikati vote magütsütettsü, ta metetdaksü.

Tesüiba mapangtem nunga ADR-i election dak sendakba nung temelenshi balala atema SC nem temepishiba aika agüja liasü.

ADR-i Supreme Court dang, SIR atema citizenship document nüngdakba ajanga talisa Muslim nungertem SCs, STs aser tangalen nungi arua mapa inyaktertem aika kongshitsü,

kechiyong Aadhaar aser ration cards magizüksü aser EC-i latettsüba mapang tatsüka tsüngda aikati nüngdakba documents mengutettsü, ta metetdaksü.

"SIR (special intensive revision) tetuyuba ya magienra iba ya ajanga nisung lakh aikati lenirtem shimtsü atema vote magütsütettsü, aser ibaji ajanga democracy linük nung election timi shidak magitettsü," ta ADR-i metetdaksü.

"Iba tetuyuba kübok mapang tatsüka tsüngda documentation nüngdakba ajanga Bihar electoral roll indang SIR renemtsü asoshi tetsükdaksü adoktsü aser vote agütsütsü temsüa alirtem tenüng lakh aika electoral roll nungi agientsü," ta ADR-i metetdaksü.

"SIR inyakyim kübok tetuyubatemji Arrla 326 alema lir, keechiyong voter kati pa senso indang kuli kaketter aser par tsüraburtem senso kuli

kaketter-a agütsütsüsa akümtsü. Ibaji meinyaktetra la/ pa tenüngji draft electoral roll nung mezüngoktsü aser electoral roll nungi tenüng agientsü," ta ADR temepishiba nungji shia lir.

Election Commission-i SIR atema mapang telatet ka dang agütsüba ya tim masü aser inyaksü makok, kechiyong nüngdakba documents malir senso lakh aikati mapang tatsüka tsüngda nüngdakba documents ji merenemtettsü, ta ADR-i metetdaksü.

"Bihar ya kanga sensak tia nung alir senso aika aliba state ka lir aser tangalen nungi arua aayangertem aika arua lir, anungji birth certificates mesüra tsürabur records indang documents mapang tatsüka tsüngda merenemtettsü. SIR tetuyuba kübok voters crore 3 dak tali electoral roll nungi agientsüa akok ta asadangteter," ta parnokisa metetdaksü.

AI tayimtsü engine yanglushitsü metetdaksür liasü

New Delhi, July 06 (Agencies): June ita nung Ahmedabad nung Air India (AI) indang tayimtsü ka tsükokba lendong nung tayimtsü nung mena alir nisung 241 asüba mapang nungi tenzüka iba lendong atalokba kuli bushisüngdangdar.

Taküm March ita nung ang European Union aviation safety agency tetuyuba kübok India nunger aviation watchdog-i Air India dang mapang shidak nung Airbus A320 indang engine parts melentsü metetdaksür liasü. Iba dak alia Air India-i tetuyubaji shidak inyak ama tiyazü records sayu, ta osang angazüker.

EU agency-ia iba lendong atalokba kuli bushisüngdangtsü, ta metetdaksüogo.

Air India Express indang tayimtsü engine majungbaji taküm March 18 nü ang metetdaksür liasü, iba sülen June ita nungbo tayimtsüji tsükok.

Air India Express ya Air India subsidiary ka lir aser parnok indang tayimtsü 115 lir.

2023 küm European Union Aviation Safety Agency-i tayimtsü manufacturing nung metokmeperi kar putetba sülen engine seals aser rotating parts melentsü atema tuyua liasü.

Iba mapang nungji agency-i, "Item parts memelenra ibaji

ajanga timtem adoktsü aser tayimtsü junga mazuoktettsü," ta metetdakja liasü.

Airbus A320 indang tayimtsü ka nung mapang shidak nung engine parts memelenbaji Directorate General of Civil Aviation (DGCA)-ia bushiteta liasü.EU agency-i, onoki maneni CFM aser DGCA den iba tatalokba bushisüngdangtsü, ta shiogo.

Taküm February ita nung Parliament nung India sorkari, 2024 küm airlines-i tetuyuba shidak meinyakba atema parnok dang tekümdangtsü metetdaksüba mesüra senchi achiba tatalokba 23 liasü, ta metetdakja liasü.

Telangana nung reactor apokba nung asür 41 jungogo

Hyderabad, July 06 (Agencies): Anogo ishika tejaklen Telangana nung Sangareddy district kübok Sigachi Industries' pharma plant nung reactor ka apokba lendong nung yirur ka hospital nung treatment tagidak mapang süogo; ibaji densemabo iba lendong nung asür ajak agi 41 jungogo, ta Amongnü ketdangsertemi metetdaksü.

June 30, 2025 nü factory nung reactor ka apokba lendong nungji aika asü aser aika hospital

nung temongdak mapang süogo. Iba lendong nung yirua hospital nung amonger nisung 14 bo taneptsü ngur pei kidangi ogo aser tang parnok 18 treatment tagidak lir.

Tamalen iba lendong nung asür nisung 40 tasü mangji par kinüngertem ket nung agüja liasü. Iba lendong nung samaba nisung 9 bo tang tashi menguteter. June 30 nü Sigachi Industries' pharma plant nung reactor apokba mapang nung iba tesem nungji mapa inyaker

ajak agi parnok 143 liasü. Iba lendong nungjagi 61 bo kümzüka liasü.

Hombarnep iba lendong atalokba sülen mezüng nisung 12 asüba jangjaa liasü.

Iba lendong atalokli Telangana assembly nung Opposition lenir aser BRS Tir, KT Rama Rao-ibo X ajanga tekeraba nung mapa inyaktertemji kümzüksü mepishiba den külemi iba lendong atalokba kuli bushisüngdangtsü takhangba agüja liasü.

GOVERNMENT OF NAGALAND

DIRECTORATE OF TECHNICAL EDUCATION

NAGALAND: KOHIMA

/Dated, Kohima the 5th July'2025.

CORRIGENDUM

NO.DTE/ESTT-24/2020-21:In continuation to this office Notification of even number dated 1st July'2025, the interview for the shortlisted candidates fortemporary engagement of Lecturers and support staffwhich was scheduled on **8th of July 2025** has been re-scheduled on the **14th of July 2025**.

Other requirements and conditions shall remain the same.

Sd/-

(Er. VIPULHOU LHOUNGU)

Director

Office of the

LONGKHUM STUDENTS' UNION

LONGKHUM: NAGALAND

(Higher the altitude, broader the horizon)

H.Q. Longkhum



TENÜNGSANG AGÜTSÜR

Longkhum Students' Union (LSU) zungsem nungi NSSB tatidang 2024 nung takok ngutetba asoshi tenungsang agütsür.

1. **Sp. Imtsüktakba Mongro**, S/o. Wb. L. Shilusangba Mongro, LDA Cum Computer Assistant (District) Director General of Police ngutetba.

2. **Kr. Imlikala Imchen**, D/o. Wb. Imnawapang, LDA Cum Computer Assistant (District), Women Resource Development ngutetba.

3. **Kr. Longtsupala**, D/o. Wb. Makenmayang, LDA Cum Computer Assistant (District), Work and Housing (NPWD) ngutetba.

4. **Sp. Arongba Imchen**, S/o. Wb. Yashimeren Imchen, LDA Cum Computer Assistant (District), Work and Housing (NPWD) ngutetba.

Tsüngremi nenok taküm aser wadang maneni moajangma.

Sd/-

Moachiba

President, LSU

Sd/-

Longrichila S Jamir

Info. and Publicity Secretary, LSU

July 06, 2025 nü New Delhi nung Union Health Minister J.P. Nadda, Delhi Chief Minister Rekha Gupta aser Delhi Health Minister, Pankaj Kumar Singh nungeri Ayushman Bharat registration vans tenzüksüdang tangokba noksa nung angur.

Mali nung kiralongrartemi India nunger asem puer ao

New Delhi, July 06 (Agencies): Mali nung al-Qaida telok den tesendaktep aliba telok kati India nunger asem puer aoba sülen parnok chioiktsü atema sen akhanger.

India nunger asem rongnungji kabo Odishia kübok Ganjam district nungi P Venkataraman lir. Tanüngba India nunger anaji ka Telangana nungi aser ka Andhra Pradesh nungi lir. Telangana aser Andhra Pradesh nungi anaji ka service engineer, Amareswar aser ka foreman, Ramana lir ta jangjaogo.

Osangbenertem den jembidang Venkataraman'er aianu kinüngbui, "Venkat-i tesüsabuba phone ajanga kü den jembiba anogoji June 30 nü liasü. Pa Mali, West Africa nung aliba cement factory ka nung inyaker. Pai kü dang, iba tesem nungji kiralongrartem aliba agi pa inyakba company-i parnok kimai ayazüka meyoker ta ashi. Iba sülen anogo ka dang lirbo July 1 nü pa puer ao," ta metetdaksü. Sub-Collector Shibashish Baral-i, "Par kinüngertemi iba osang metetdaksüba sülen onoki tongtepratepogo. Sorkari nüngdakba mera agia inyakdar," ta metetdaksü. Ministry of External Affairs

(MEA)-ia sangdong ka ajanga, "Mali kübok Kayes yimti nung kiralongrartemi Diamond Cement Factory amakba mapang nung India nungertem puer aoba osang metetogo. Iba factory ji Hyderabad nung amenoka aliba Prasaditya Group meyong lir. July 1 anogo nung kiralongrartemi Mali tesem balala nung sepaitem aser sorkar kiojentem amakba osang India sorkari metetogo," ta metetdaksü.

Iba tatalokba aitsüba den külemi MEA-i, Bamako nung aliba Indian embassy-i Mali ketdangsertem, ozüng benokba agencies aser Diamond Cement Factory nung ketdangsertem den maneni tongtepratepa inyakdar, ta metetdaksü.

MEA-isa, parnoki India nunger asem kibongtem den-a maneni tongtepratepdar, ta metetdaksü.

India nunger asem puer aoertemji al Qaida telok den sendaktepa aliba Jama'at Nusrat al-Islam wal-Muslimin (JNIM) teloki asütsüa akok, ta security agencies-i bilemer.

Prasaditya Group nungi ketdangser kar Mali tonga ogo aser India nunger asemji kümzüksü atema parnoki Mali ketdangsertem den amalitepa inyaksangshidar.



TIR YIMYIM YIMOBILEM (EDITORIAL)

DIMAPUR

TENTONÜ

CHITENI 07, 2025

Asenoki jaokba timtem

Tang ama meiwa mapang tzünglu kanga sashia arudang anentsü aluba aser lenden lima tzümetsüng adokbatem ya alima nung nisungtemi nokdang menokdangtetba timtem aser tebilemstütem lir, anungji asenok kümdanga alitsüba dak alaka tzünglu aser tzümetsüngbo asenoki menokdangtettsü. Ajisüaka, asenok asoshi takoktsü kaji tzünglu aser tzümetsüng agi bener arutsüba lendong, takoksa aser timtem nungibo asenoki asenoksasa jenbutettsü. Aji oda, asen lima nungsa asüyonga Dimapur ama lenden lima nungbo küm shia tzünglu aruba ajanga kiyong aika nung nisungtem telidak ki dena atsüngbanga takoksa ajurur. Iba kasa lendong timtemji Dimapur nung tanüa atalokdagi aser Kohima nunga dena yimti yimdong motzü agi atsüngbanga ayimba angur. Item timtem lendong aser takoksaji kodang bilemdangdir, lenden limasa asüyonga Dimapur ama ayong agi meketbanger aliba tekong nung tzünglu mapang tatsüka aru nung yimti yimdong dena tzü agi metsüngbangtsüsa atalokbajibo tzünglu aruba agi masü saka asenoki asen alidak nungi tzü yimzüka aotsüsa lenmang sadema meyutsüba ajanga atalokba timtemtem lir. Ashi, Dimapur lima yateta mesemteter dang pelatsüba kaji, Dimapur ya lenden lima tenzükdak tekong mejungketa aliba tesem ka reprangteta mesemtetba lir, anungji anüdok aser anülulen ajaklen yimti kümteta aliba tekong nungi tzünglu arudang tzü melamelaa pasasa süzüka aotsüsa teküpboklen ajaklen ayongnutem lir. Aji oda, asen lima nung tzünglu aruyonga anogo piyong mesüra aonung piyong arubabo masü mesüra ayong nung tzü agi masem mobanger adokba tzümetsünga masü saka ghonda ka shi danga tzünglu aru nung tzü taolen mali pei kima atsüngbangtsüsa akümer, anungji ibajibo asenoki asenoksasa jaokba timtem-ang ka lir. Iba timtemji asenoki mebilemdangi ali rongsen arishia kiojen yangluba nungi ataloker. Atangji, government nung alirtem dang atongtsüa tuluka lir, kechiyong government nung lenmang reprangtsü purtemi lenmang merepranger, anungji leman yanglu dang kilentzü mali ser yanglur aser ano tesem aika nung lenmang teküpbok aser kilentzü teka ta ser yanglubaa asenoki angutsü. Iba ama lenmang aser kilentsü yanglur engineer-temji tesüngmangtsüka lir aser ano iba dang nungi tesüngmangtsüba kaji lenmang junga meyanglubajibo toktsür, tzü taolen malitsüsa lenmang yangluba mapa agi tenük sünger sen (bill) agütsürtemji asütsü. Aji oda, Nagaland nung ya lenmang meyangluba agi lenmang majung timtemer masü saka Khristan tulus aser contractor-temi sen achitsü bilema lenmang mashimashi yanglua toktsüba ajanga timatemer. Atangji, tang asenoki ajuruba timtem aser takoksatem ya Khristan tulus aser contractor-tem dang kisüng atongtsülabo masü, kechiyong asenok Khristan pur nütsüng nübortemia Tsüngremi moatsüba rongsen amshia ali kimong aser kiojen yangludang, asenoki tangar asoshi dang masü saka asüng asenok lia aotsüba anogotem indanga mebilemi tzü aolen nokdanga yutsür aser asenok karibo akhidang nungi ayong küma tzü yimzüka aolen ali agi onbanger iba madakji ki yanglur. Item purtemji takartem lir saka pei akaba agi alima topur jungdaksütsü bilema inyakertem masü, saka ozü kara ojang, ozü kimong aser ozü ki sadema yanglutetra ojang ta bilema motzü aolena mali ki yanglur aser karibo yimkong jajaba lenmang dena agisemertem lir. Iba jagi tang ama tzünglu aruba mapang pi dang masü saka pei dena kidang nungi madoktettsüsa timtem ajurur. Tangbo tzünglu mapang tatsüka aruba ajanga tzümetsüng agi timtemba indang jembir, ajisüaka kiojen aser ki oset aser alu raksaba dak alaka nisung asü-amababo mali. Aji oda, anogo ishika sülen tzümetsüng ya aremstü aser ano asenoki timtem ajurutsüba indang ya amadoktsü. Ajisüaka, ano asenoki jaokba lendong tuluba ajurutsüba ka anünga lir, aji menoknok lendong asütsü. Tia makaka asen lima nunga menoknok teyarika anak nungbo, anak manok ka laotsüsa kiojen aika asenoki mashimashi yanglua lir. Aji oda, tzünglu aruba agi masü aser menoknok anakba agia masü, saka asenok merumeruba agi asenoksasa, an molokbang nung atema ama, tanen maka lendong timtem ajurutsü anendaka lir. Iba ama lendong timtemji majurtsü atema government inyakyim akangshitsüla aser nübortem daka tangatetba alitsüla.

OLEMSABANG

Aor Tar Yimsüyimbong

Wt. Repabenla, Asst. Professor, FAC

Okila

Alemli asen Aor otsüla oboula nunger külemküja otsürenji kodang bushidangdir par taküm yimya libaliru ajak ya sentaktepa liasü. Pari amangba yimsü ya lateta ayuba yimsüyimbong ka masü, saka parnok shisatsü agi kechi tashi tsüngremji rateter aser libalirua aodang iba yabo tanela ka alitsü südi ta ajangshiba ajak nung parnoki aküm tetushi agüja külemasa aru. Aorsa süaka yimtsüng aika nung külemküjaba yayim balala liasü.



Kechiaser iba ya Christianity, Hinduism, Islam ama telatet ka mali asü.

Tanü Aor rongnung amungtsümung aika mamunger saka otsüla oboula nungertemi temoatsü angudang, lendong atalokdang, takoksa tia ajurudang, kirung lurung mapang, ajak nung amungtsümung munga aru. Kechiaser parnoki tia ajak ya tsüngrem kati ataloktsür ta amang. Kodangsa parnoki item tanelatemji külemdir kanga dang anembonga mesümeyakasa amung. Iba külemba mapang yabo sobusolemtsüa balaka agir ola madoki tsübuseta külem. Kechiaser iba ya külempetra arishi malanger, atakatem arur ta parnoki amanga liasü.

Item ajak yagi sayur asen tetsüteboutemi külemba tar yimsüyimbong ya kangasa metsünga reta amshi, aser pari angatetba tsüngremji tapu aika liasü ta bushiteter. Parnokia asüyim ka lir ta amang aser shiri akümüli alidang ochi shia asüngteta meliteter obendangba tsüngdang meyimbanga meyteteti temeten mangur aser pa/la bo teti asoshi temerenshi angur ta jembia aru.

Tar Yimsüyimbong ajakji tajung ta ashir masü saka Khrista yimsü aruba mapang nungi tanü tashi nung Tar Yimsüyimbong tajung aika asenoki mepenshi sama-a odagi. Tanü asen putu aser yimsü den meputepa itemjibo metongshitsü nüngdak, saka Tar nunger Yimsüyimbong ta sür tajung majung ajak toktsübaji tim masü ta angatet nung item ya lushia bushidangtsü nüngdak ta ajiteter.

Kodang asenoki tar yimsüyimbongji shisadangdir par tokolok, shisatsü ajak nung tsüngrem ka lir ta amangba agi sünga liasü, parnok tenük agi menguaka süng, lung item ajak nung ya tanela ka lir ta amang. Anungji, pari inyakba mapa ajak nung tiatsür tsüngremji külemerang maparen ajak tenzüka otsütem nung angutsü. Par maparen kar reprangdangdi.

1. Amungtsümung

Akhi alemli otsüla oboula nunger taküm chiyungtsü asoshi alu ayimba ya dang liasü. Tanü asen putu amai lenmang balala nungi züsenteta chiyunga aruba yimya ya mali asü. Parnoki metsü alitsü asoshi tzüma lenisa aluba dak alema taküm ajakji alu dak dang metaloker ali. Anungji alu tasen lepokba nungi tenzüka tsük agi ki matong tashi parnoki amung balala munga tiar külemasa aru. Parnoki amangba kaji kodang kiburji peladaksüdir iba kümji alu nung achi asüng, saka parnoki kiburji junga mekülemra iba kümji yipru mopung aser mesen, koya wara bulua arua achi masünger ta amanga aru.

Yimya agi alu tasen ka lepokbaji Mongputeni - Yimpoksü ita tsüngta lepoker, saka aremji melepokdang Süngku Lepden mung ka amungtsü. Aser iba amung atema putu yimsüsürtemi anogo ka metetdaksür yimer ajaki amunger. Alu tasen lepokdang yiruyibong, tetsüdaktsü mesüra tasütama telidaktsü saka arem ajak meshitetja keyi, pongzü aser temenen mojing aritokja temoatsü meshia külema amungba lir. Iba sülen Süngku Mesü mung amunger, iba amung yabo shirnok alu ayimtsüpur lir parnoki pei lu/lumang meshiteta amungba lir. Iba lu nung senzüdang timtem nungi kümzükan aser molamoshia moajang ta külemer. Iba mapang ya parnoki alu jagi an bener oa, aji tezüng petoka 'na sa tama agiangji' ta shia ali nungji yi shilokja anji tepseta sor tila ka agizüker 'na tama chiang' ta shia külema 'süng züng, lung züng ajak nung meyu sa meyu jenti rena moajang ni' ta temoatsü meshia amung. Yamajisa tatongsena mongpu dak apet Alurung mung amunger. Iba tekülem nung nisüng shiruru mesüra memerükba oset kar rungsema lira item ajak nungi meshitetjang ta külema amungba.

(Maneni asüng adok nung angutsü...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Kajiado region nung tang mezüנג nung Khrista osang proker



Kenya kübok Kajiado region nung nurse temi longkak aitdang tangokba noksa nung angur.

July 06, 2025: Kenya nung Pentecostal Arogotemi, linük nung nurse temi longkak aitba ajanga parnoki Kajiado region nung Khrista osangtajung proktsü atema maongka angu, ta metetdaksü.

UK nung amenoka aliba Christian medical team ka aser Kenya nung aliba Pentecostal Arogotemi tesüiba küm 30 tashi Kajiado region nung Maasai nungertem nem healthcare service agütsütsü aser Khrista osangtajung proktsü meranga aruogo, ajisüaka Maasai nungertemi sobaliba kanga akhümtsübuba ajanga küm aika meinyakteti aru.

Lisopur telok, Maasai Association-i, "Onoki Arogotem manemer saka ozü sobaliba wazüka yuner," ta ashir.

Maasai Association nung managing director, Kakuta Ole Maimai-i, "Temelenshi ajanga takoksa anguba dang nungibo temelenshi atema inyakterem ang asütsü," ta ashi.

Ajisüaka taküm April ita nung nurse temi Kajiado region nung healthcare infrastructure kanga majungba anema longkak aitba ajanga Arogotemi Khrista osangtajung proktsü atema maongka angu. Nurse temi longkak aitba mapang nungji iba tesem jagi UK charity TOSOL Initiative-a arua lasü.

Bisil nung pastor, Paul Sikolia Sahale-i "Tsüngremer sentongji khenyongi balaka lir. Kanga mapang tetemsü ka nung medical outreach atema TOSOL yagi aru," ta ashi.

Elim Missions den külemi TOSOL team-i Kajiado region nung medical teyari agütsüba den külemi surgical oset aika agütsü, iba denji külemi surgery agiba tasa balala sayua lasü.

Parnoki region nung yirua alirtem aser tenük majungertem noklang aika yaria lasü, aser iba mapang nungji parnok den Khrista osang lemsateptsü maongka angu.

TOSOL nungi biomedical scientist, Ajileye-i, "Medical outreach agiba ajanga Arogo nung volunteer temi pei nüburtem tenzüksü atema maongka angu. Parnoki Elim Church indang ID card khaloker tenzükbba mapa inyakba ajanga region nung aliba nüburtem den tesendaktep tajungba aküm," ta metetdaksü.

Surgery aika takok ngua agiba sülen kin 11-i Tenla ki tasen aika asütsü atema Elim Pentecostal Church nem ali acre 20 tenla agüja lasü.

Paranai nunga Tenla ki tasen ka yanglu aser iba Arogo nungji züngsem 60 lir. Iba dak alia Bible school ka amenoktsü atema ali acre 2 agütsü.

TOSOL team-i, mezünyongi telangzüba tajung anguba atema onok kanga pelar, ta ashi.

West Midlands nung aliba Russel Hall hospital nungi

British nunger surgeon, Dr Akinfemi Akingboye-i, "Onoki asalentong kanga junga meyanglu ama bilema lasü. Ajisüaka tang tesendaktep tajung yanglutetba ya Tsüngrem adenba agi lir," ta ashi.

Kenya nung Elim Pentecostal Church-i linük tesem balala nung Arogo 400 dak tali tentettsüogo, aser tang Kajiado region nunga Arogo tasen tenzüksü.

Elim secretary general, Martin Muita-i, "2027 küm tashi nungbo onoki iba region nung Arogo 100 bosa tenzüksütsü yongyar," ta metetdaksü.

Dr Akingboye-ia, "Onoki tesem balala nung Arogo tasenpurtem tashi itdaksütsü atema inyaker. Ni Tsüngrem dang taruba outreach nungbo tanela asentenshi milak jangrudakjang ta sarasademer," ta metetdaksü.

ANOGO ABEN TSÜNGREM DEN

Tajungshiba Sempet

Saka kü adianu aser kü medemer inyaker aser kü medemer sepia, kü tenükdaksü nung nenok tenyar aser tenzüker, Epabrodita, nenok dangi noktsü tenükdaksü ta ni bilemer. Fil. 2:25.

Nisung kari shirnok timtem mapang ajanger aor parnok dang tasü aittsü o mapang shidak nung kechi ashitsü metetta lir. Item nüburi Tsüngrem ola angatetta alir. Parnoki pei atema mebilemer mesüra parnok meketa atalokba memeteti malir. Mepetmesü mapang nung parnoki jet ta arua yarir. Timtem mapang nung parnok ajar, kechiaser parnok aliba jagi asenok tasü itdaksür.

Timtem koda masü mapang Tsüngremi teyari yokba Laishiba nung kuli aika agütsür. Kodang Mosa pa mapa agi nungpanger koda mesüi alidang, pa yaritsü Jethro yoka aser pa ajungshi. Jethroi Mosa nem shisatsü tajung agütsü aser iba jagi Mosa mapa nung yari (Anitet 18:1-27).

Kodang Paul pa meimertem nungi talangka pilar tepuokdak ayu, Epafroditai timtem agia Paul tepuokdak yaritsü ao (Fil. 2:25-30).

Pauli Timotia arutsü asüngdang (2 Tim. 4:9; Fil. 2:19-20). Tesülen pai Marka anir arutsü ashi. Mark Paul temeim tembar ka lasü. Pa timtem nung alidang pai yari (2 Tim. 4:11; Filemon 24). Pauli Luka tajungshiba nunga temulung toka lasü. Ajak mazüangi alidang Luka Paul den lasü (2 Tim. 4:11) Paul tetentangba ajanga aodang Tsüngremi temeshi tembartem Pauli dangi yoka, parnoki lemanng balala nungi tenla agüja yariba Paul taküm lidaksü.

Tsüngremi na tangar nem teyari agütsüba tashi tait tembar ka südaksüner. Nai lemsatepba o aser mapa jagi kibong, ne tembartem, ne kiyonger aser külem inyakterem dangi tesünep aser tasü tait bener arutsür.

Chhattisgarh nung pastor ka dak azük aser Laishiba rongdoktsü

New Delhi, July 06 (Agencies): Chhattisgarh state nung Hindu yimsü alia amanger telok kati Tenla ki ka bensatsü, pastor den Arogo züngsemtem dak azük aser Laishiba aika rongdoktsü, ta osang ka ajanga metetdaksü.

Chhattisgarh state nung Dhamtari District kübok Borsi yimdak independent Penial Prayer Fellowship nung züngsemtem tekülem sentong tagidak mapang nung Hindu nungertem aru.

Iba Fellowship nung pastor, Wakish Sahu aser tebu, Mannohan Sahu na leniba nung tekülem sentong tagidak mapang Hindu nunger telok ka aru.

Osangbener den jembidang pastor-i, "Parnoki tashiyim amshia Tenla ki telungi aitba sülen tekülem sentong tagidak mapang timtem agütsü. Parnok ket nung süngsü lasü aser parnoki 'Jai Shri Ram' ta yimyim ayim," ta metetdaksü.

Parnoki Khristantem dang, nenoki joko tekülem sentong magitsüla, ta amokmerena

Tenla kidang menden, fan aser kongki balala raksatsüba den külemi osangtajung ken kakettem aser Laishiba aika rongdoktsü, ta pastor-isa metetdaksü.

Parnoki kübu, Pastor Mannohan Sahu dak azük aser tejak nung aiben maoktsü, aser süng amshia tekolak nung azük, ta Pastor Wakish Sahu-i ashi. "Kübu dak maneni azükba ajanga pa süchia ao. Hindu nungertem jagi kübu süadok asütsüa akok ta bilema tetsübu nung pa nem tzü jemdaksü," ta pai ashi.

Hindu nunger lokti jagisa Pastor Wakish Sahu tetsü densema Khristan 15 dak azük.

"Tetsür ana aser tebur pongu kanga mejungi yirua hospital-i anir ao," ta pai ashi.

Khristantem dak azükertemji yimdak nungibo pongu-tenet shi dang lasü aser tanüngba nisungtemjibo tangalen nungi aruba lasü.

Tesülen Pastor Wakish Sahu-i Maganlodh police station-i oa ken o agütsü saka police-i ken oji magizüki tama

bushisüngdangtsü ta ashi.

"Iba tatalokba mapang nungjagi tenzüka tamangertem tekülem kidangi marur. Ajisüaka ozü kibong züngsem 10 bo kasa tesem nungjisa tekülem sentong agir. Onoki tetsübu nem mekokdaksütsü," ta Pastor Wakish Sahu-i ashi.

"Yaküm June ita nunga Hindu yimsü alia amangertemi iba Arogo nung züngsemtem amokmerena lasü. Iba mapang nungjibo ozü Arogo nung züngsem 50 shi lasü saka yaküm onok amokmerenba sülen Arogo nung züngsem 15 dang kümogo," ta pai ashi.

Yaküm iba Arogo amakba sülen Dhamtari nung Khristan lenirtemi District Collector nem temepishiba shidi ka agüja lasü.

"Yaküm iba tatalokba mapang nungjagi tenzüka Amongnü shia Police-i patrolling senzür. Police-i onok dang tekülem sentong nungji anasa aliba yimtsüנג nung alirtembo madentsüla ta tuyua lasü," ta pastor-i metetdaksü.

"Joko yimdak Khristantem

aikati tetsübu nung parnoki anasa aliba yimtsüנג aser yimtitem nung aliba Arogotem nung ang adentsü ta shiogo. Ajisüaka yimtitem nunga Khristantem anema inyaker," ta pai metetdaksü.

June 29 nüa Bajrang Dal züngsemtemi Dhamtari nung aliba Elohim Church amak, ta Pastor Alok Majumdar-i metetdaksü.

Pastor Alok-i, "Onok tekülem sentong tagidak mapang nung Hindu yimsü alia amangertem arua Hindu nunger ken tena lasü. Tesülen police arua Bajrang Dal züngsemtemji meindok," ta metetdaksü.

Kasa anogo nungjisa kasa district nung Hindu yimsü alia amangertemi Gopal Puri nung aliba Tenla ki ka amak.

Dhamtari district nung Pastor Raju Verghese, Pastor Majumdar aser Dhamtari Christian Forum Tir, Rev. Diamond Phillius nungeri July 1 nü District Collector, Avinash Mishra nem temepishiba shidi ka agütsüogo.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Teptepa

(adj) kanga tammang (extreme darkness)

* Teptepa manger ayaterem nung onok aenleni apuso.

Teptet

(v) nemzüa senzür lenmang tonga adok, tesem ka atong (reached a main road or a place after a search)

* Onok anogo piyong arem nung nemzür tesüsa lendi teptet.

OLONG PAITEP # 7202

1						2				3
								4		
5		6				7				
8										9
								10		
				11		12				
		13								
14						15				
			16							

TIPIEN

- O jembitsü tashi - 8
- Süngjang tapu ka - 5
- Tekanük nung enokba - 5
- Teka amtep - 5
- Tsök asendak - 5
- Tsüngpang tema aliba - 5
- Ken atenba yimya - 5
- Asangur - 8

LANGTSÜNGLEN

- Tepok telung nung shilem ka - 7
- Tamajung aküm - 5
- Chi den külemi achiba - 3
- Meimchir alimai aruba - 3
- Laishiba nung ayong ka - 4
- Tarutsü nükla - 7
- Tamentakdak/Nükjidong - 4
- Tenük-telen mejungi aküm - 5
- Terok nungi adokba - 3
- Meimchir telemsa - 3

OLONG PAITEP # 7201 TELANGZÜBA**TIPIEN :**

- Kilem, 5. Lasüng, 7. Samaru,
11. Jala, 12. Naro, 15. Langzü,
17. Sabang, 18. Arong.

LANGTSÜNGLEN :

- Lasa, 3. Kar, 4. Ana, 5. Langtsüng,
6. Sujung, 8. Rajem, 9. Arogo,
10. Tanela, 13. Züno, 14. Lao, 16. Anu.

NAI-A YA METETTER MA

Gado tenük yabo tekolak tiplentsütsü tena
lir asünungji, mapang ajak nung tetsüng
pezüprong repringtsü akoker.
Koda tesüngmangtsü !

Arunachal sorkari scholarships sen crore 111 agütsüogo

Itanagar, Chiteni/July 5
(Agencies): Arunachal Pradesh sorkari 2024-25 academic year atema kaketshir 40,090 ajangzükdaktsütsü asoshi sen crore 111.11 agütsüogo, aser iba ajanga kaketshirtem nongita yaritsü atema sorkar bendanga agütsür aliba sayur. Official sangdong ka ajanga ashiba agi, scholarship ya anogo pongu tsüngda kaketshirtem indang bank

accounts nung indang indang inoktsütsü. National Scholarship Portal (NSP) ajanga inyakyim bangdaka alibatem takok ngua inyakba sülen iba jenjang ya agitsü.

Tang tashi nung iba scheme yagi kaketshir 45,125 ayimjemogo, kong kaketshir 5,035 indang senbo taoba mapang agüjatokogo.

Ajisüaka sorkari ashiba agi, kaketshirtem bank account dak sendakba nung timtem

aliba ajanga kaketshir 2,796 nem sen intoktsüba bangdaka lir. Item kaketshirtem dang bank temi takaratiba nung oa ken o bentettsü metetdaksüogo.

Scholarship lemetsüba ya Chief Minister Pema Khandu aser Education Minister Pasang Dorjee Sona nati Arunachal Pradesh Legislative Assembly Hon jubilee amungba mapang nangzükba ama inyakba lir.

Manipur police-i Imphal nung gari auyar asem apu

Imphal, Chiteni/July 6
(Agencies): Manipur Police indang Anti-Vehicle Lifting Squad-i, gari auyaba telok ka nung densema alitsü ta temulung melemi bilemba nisung asem puogo, ta ketdangsürtemi Deobarnü metetdaksü. State nung gari dak sendakba nung inyakyim anema jenjang agiba mapang tang item nisungtem ya puogo.

Tawa gari auyba telok ka tentetba indang itangitertemi osang agütsüba sülen Imphal City Police-i Honibarnü Imphal kübok Waheng Leikai parking tesem nung sang sua toktsü. Iba inyakyim benoka inyakba sülen

nisung asem puogo, shirnok gari auyaba ken o aika nung sendaka lir.

Gari auyartem asütsü ta temulung melemi bilemertem ya Mayang Imphal Khelakhong Mayai Leikai nungi Sayed Farish (19), Irong Makha Leikai nungi Md. Sahidur Rahaman (28) aser Irong Makha Leikai nungisa Chesam Musaraf (22) ta jangjaogo.

Ken o ashishiba mapang parnok asem ya taoba ita ishika tsüngda gari balala auyaba nung densema aliba police temi jangja aküm. Parnok apuba mapang nung gari ka danga mongutet, saka auyar or aliba garitem

meyipa bener arutsü atema inyaktepdar.

Aija alir asem anema Bharatiya Nyaya Sanhita (BNS) kübok Sections 112, 303, aser 303(2) nung ajemdaker ken o benokogo.

Tawa Thoubal district nung Lilong Police Station kübok Lilong Turel Ahanbi tesem nungi auyar or aliba gari pezü ngutetba sülen tang item nisungtem ya puogo. Police temi meyipa anguba garitem rongnung Mahindra Bolero temesüng ka, Maruti Suzuki Fronx blue ka, Maruti Suzuki Swift silky silver ka aser TATA Xenon tanak ka densema liasü.

Assam: Samar bushia aliba nisung ka tasümang ngutetogo

Guwahati, Chiteni/July 6
(Agencies): Assam police-i Indo-Bhutan arrtsü nung tasümang ka shir lia ngutetogo. Asüsang ya arishi küm 29 tain Raj Kumar Sarkar ta jangjaogo, shiba Chirang district nung Singa Police Station kübok Khatlapara yimtsüng nungi lir.

Sarkar ya June 12 nü nungi samar bushia liasü. Pa tasümang ya Devoalguri yimtsüng kübok Lungsung tesem anasa arem ka nung ngutet, koba Bhutan den arrtsü anasa Kokrajhar district nung Bishmuri Police Station kübok lir.

Osang ajanga ashiba agi, Sarkar ya tatamsa Khatlapara nungi nisung ka tenüng agi Ajay Mandal den senzüya

angu, shibai pa June 12 nü yimtsüng nungi anir oa liasü. Iba sülen Sarkar ya kidangi meyipa maru.

Sarkar samaba sülen par kinungertemi Basugaon Police Station nung pa samba osang agüja liasü. Iba sülen police-i bushisüngdang nung shilem ka ama Mandal aser par kinungertem dang ken o ashishiogo.

"Tang bushisüngdanga aliba dak ajemdaker meita aoba mapang tasümang ya kinük nung aliba arem ka nung nguteta liasü. Tasümang ajanga nisungba ya sür anogo ishikabo jungogo ta sayur," ta Additional SP (Crime), Chirang Police Amathi Kumar Mahato-i ashi. Nisungba ya kodaser asü aji

tejangja metettsü atema post-mortem examination ka agitsü tetuyuba agütsüogo.

Ketdangsürtemi iba nisungba ya tepset asütsü ta temulung melemi bilemer. Maneni nisungba ya kodaser asü aji jangjatsü atema bushisüngdang südar.

Basugaon Police Station, Officer-in-Charge Biplab Kaur aser Santipur Outpost In-Charge Sunil Kumar Gurung nati anir meita aoba mapang iba tasümang ngutet aser bushisüngdanga tenati achaayanga liasü.

Police-i, ken o kanga junga bushisüngdangtsü aser aibelena alirtem nem tapet temerenshi agütsütsü tanangzükba agütsüogo.



July 06, 2025 : Arunachal Pradesh kübok Kokila, Hollong tesem nung asüpila sentong ka nung mepetmesü tulu adoka liasü. Ali amshiba dak sendakba nung yimdaklirtem aser Chakma nunger refugee tem tsüngda mangatetep adoka liasü.

Texas tzümetsüng nung asür nisung 51 jungogo



Kerr County, Chiteni/July 06 (Agencies): Texas tiyonglen ajungben tzümetsüng adokba nung tanur 15 densema nisung 51 asüba sülen ano samar aliba nisung bushitsü asoshi rescuers noklang aika yoka lir.

Iba lendong agi tamajungtiba kongshiba tesem ya Kerr County alitsü, kong nisung 43 asü aser River Guadalupe anasa Christian youth camp ka nung dena alir tanur 27 tang tashi monguteti lir.

"Mapa maneni inyaktar aser nisung ajunga mangu tashi maneni inyaktsü," ta Kerr County sheriff Larry Leitha-i nangzük.

Travis County aser Tom Green County densema ano state tesem balala nung nisung asüba jangjaogo.

Central Texas nung hopta tatemlen tesem aika nung ajungben tzümetsüng adoktsü shia lir.

Tang tashinung nisung 850 shi kumzüka lir.

Honibar nikongdang osangbener senden ka nung jembidang, Texas Governor Greg Abbott-i samar aliba bushiba nung tashi itshitsü atema "expanded disaster declaration" ka nung meyongnem agütsüogo ta ashi.

Iba tatalokba agi menepa alir nisung ajak ngutettsü asoshi ketdangsür temi tanen makai inyaktsü aser mapa renemba sülen ang anentsü, ta pai ashi.

Tzümetsüng agi pongzüka bener aortem angutsü meranga rescuers tem Guadalupe River sema senzür, ta ketdangsür temi ashir.

US Tir Donald Trump-ia pa indang administration-i yangji aliba ketdangsürtem den nüngdakba nung yariteptar ta shiogo.

Honibarnü tzünglu 2 nungi 5in (5cm nungi 12cm) tashi arutsü akok, ta National Weather Service (NWS) ajanga shia lir.

Hokulbarnü tzümetsüng agi kongshir aliba tesem kar

nungbo tzünglu 10in tashi arutsü akok.

Camp Mystic ta nüngja agütsür Guadalupe River ayongkum nung tetsürchanu kisüng Christian summer camp tuluka aliba nung ketdangsür temi tali rangloker.

Yangji samar aliba tetsürchanu 27 nungi aika arishi küm 12 tekübok lir, ta Texas Lieutenant Governor Dan Patrick-i osangbener dang ashi.

Iba camp nung tangokba noksa tem nung blankets, mattress, teddy bears aser danga osettsüset tem mulushi agi mezübelanger liasü.

Hokulbarnep ghonda ka majungdang ayong nung tzü feet 26 dak tema kuma ayim dang aika mejanga liasü.

Iba camp nung nisung 750 shi liasü ta ashir.

Asürtem karbo arishi küm ti tanura lir ta jangjatar. Iba lendong ajurur alirtem asoshi Deobarnü Notre Dame Catholic Church nung sarasadem sentong balaka agitsü.

Iran-i Afghan nunger million aika dang linük yutsür ainshitsü ashir

Tehran, Chiteni/July 06 (Agencies): Iran nung aliba Afghan migrants aser refugee million aika dang linük yutsür ainshitsü mesüra aputsü ta shiogo, aser sorkari anogo züngzüksüba tatem leni arur.

Israel den anogo 12 raraba sülen security tsütsü nüburtem tebilemtsü akaba mapang Deobarnü tashi anogo züngzüksüba atonger. Israel den anogo 12 raraba mapang United States aden aser Iran indang uranium enrichment facilities nung tayimtsü amshia amak.

Ajisüaka humanitarian organisations temi nisung ajak meindokba ajanga Afghanistan tia tali tamajungba akumtsü ta tekumdangtsü ashir. Iran nung Afghan nunger migrant aser refugee million pezü shi lir aser nisung aika yangji küm aika alir.

2023 küm Tehran-i linük nung özüng alema arua aliba bendanger tem meindoktsü campaign ka tenzüka liasü. March ita Iran sorkari Afghan nunger alitsü temeden mali arua alirtem Deobarnü tashinung pei sasa linük yutsür aotsüla, mesüra meindoktsü, ta totuyuba agüja liasü.

Iba sülen Afghan nunger nisung 700,000 dak tema Iran yutsür ogo aser ano nisung meyirijang aika meindoktsü. June ita kisüng nunga nisung 230,000 dak tema Iran yutsür ao, ta United Nations International Organization for

Migration ajanga ashi. Sorkari Afghan nunger dak tenük yoker masü ta ashir, shirnok rara, makamait aser Taliban yimsüsüba nungi jenbutsü mechi pei linük yutsür jena aruba lir.

Israel den raraba mapang Iran-i anogo nung Afghan nunger 30,000 dak tema par linüki meyipa yoka liasü ta UN High Commissioner for Refugees (UNHCR) ajanga ashir. Rara metenzük dang anogo nung nisung 2,000 shi yoka liasü.

"Onoki teti hosts tajung ka ama alitsü meranger, saka national security ya tongtipangtiba, aser yimya agi 'illegal nationals' tem meyipa aotsüla," ta Iran sorkar indang odongtar Fatemeh Mohajerani-i Mongulbarnü shia liasü.

Afghan nunger 1.2 million meyipa shilangba nungi tesadang ka dak tema Iran nungi par lir aser parnok ya Iran sorkari March 20 nü anogo züngzüksüba sülen meyipa shilangba lir, ta UNHCR ajanga taoba ita tatemlen shia liasü.

"Parnok ya bus tem nung arur, aser khen-khenbo mapang ka nung bus pongu tashia arur, aser bus nungi aludaktsür, aser parnok ya mangmangtepa, nemzünemponga aser anibelem aser yasa-tzüra arür," ta Afghanistan nung UNHCR representative Arafat Jamal-i arütsü alemba tesem nung atalokba shia liasü.

Brazil nung BRICS senden amener, Putin aser Jinping maden

Rio de Janeiro, Chiteni/July 06 (Agencies): BRICS telok nungi lenirtem Brazil nung adenshitar, ajisüaka United States Tir Donald Trump indang tariff policy tasenba ajanga parnok mulungjang nung tesangwa ka makar.

Lenirtem ya timba developing world nungi lir aser Rio de Janeiro nung Deobarnü nungi tenzüka anogo ana senden amenba mapang anüolen linük temi amokbangba tebilemtsü bener parnok tsüngta amalitep tali akatsü asoshi lenmang bushia jembishinütsü.

BRICS nüngja ya iba telok tentetba linüktem - Brazil, Russia, India, China aser South Africa tenüng tetenzük ojang lir. Iba bloc senden mezüngbuba 2009 nung amen aser meilongi Egypt, Ethiopia, Indonesia, Iran, Saudi Arabia aser United Arab Emirates linüktema züngsem ama bendenlok. Yangi ano 'strategic partner' linük ter lir, koba taoba küm tentet aser yangji Belarus, Cuba aser Vietnam dena lir.

Russia Tir Vladimir Putin-a iba senden nung madentsü, kechiaser 2022 küm nungi Ukraine amakba mechi International Criminal Court (ICC) ajanga pa aputsü bushir. Brazil ya Rome Statute nung meyongnem agütsür ka asünungji, Putin aputsü ICC ajanga totuyuba agüja aliba ama pari inyaktüla.

Tang BRICS menden Brazil-i bena lir aser iba senden nung Trump indang administration ajanga "indiscriminate trade tariffs" aitsütsü imlar, kechiaser iba ya özüng alema lir aser alima rongsenketzüng nung timtem tulu ajurutsü ta ashir. Iba senden nung global health policies, artificial intelligence aser tzü-mopung melenba indang onüktema jembitsü.

BRICS ya alima nung nisung meimchir nütsüng yongsük tesadang ka jungnüa asoshi aser alima nung ali shilem 36 aser global economic output shilem pezüsü nung ka lir ta ashir. Iba bloc ya Global South nung aliba linüktem tsüngta amalitep akatsü aser Group of Seven (G7) den kasa lir ta jembir.

Ajisüaka iba telok nung telemsa aliba ajiteter. Osang kar ajanga ashiba agi, züngsem linük kari Israel-i Gaza nung raraba aser tawa Iran amakba anema tesashiba nokdakner. Iba senden nung Iran Tir Masoud Pezeshkian aser Egypt Tir Abdel Fattah el-Sisi adentsü.



भारतीय वायु सेना / INDIAN AIR FORCE

JOIN INDIAN AIR FORCE AS AGNIVEERVAYU



INDIAN AIR FORCE AJANGA AGNIPATH SCHEME KÜBOK AGNIVEERVAYU UNTAKE 02/2026 AOSHI SELECTION TEST ATEMA KIBONG MAKUM ALIBA INDIA NUNGER TEBUR ASER TETSÜR CANDIDATES NUNGI ONLINE APPLICATION MESHIR

Online Registration anogo : July 11, 2025 anüngdang 11:00 ako nungi July 31, 2025 aonung 11:00 ako tashi
Online Examination anogo : September 25, 2025 nungi tenzüksü.
Registration atema web portal : <https://agnipathvayu.cdac.in>
Date of Birth Block : 02 July 2005 aser 02 January 2009 tsüngta asor asütsüla (anogo anaprong dener)

Educational Qualification:

1. Science Subjects.

Candidates tem Central, State aser UT ajanga recognise süa aliba Education Boards nungi Mathematics, Physics aser English dener Intermediate/ 10+2/ Equivalent examination nung tajemba agi marks 50% aser English nung marks 50% ngua pass sür alitsüla.

MESÜRA

Central, State aser UT ajanga recognised süa aliba Polytechnic institute nungi aggregate marks 50% nung Three years Diploma Course in Engineering (Mechanical/ Electrical/ Electronics/ Automobile/ Computer Science/ Instrumentation Technology/ Information Technology) pass sür alitsüla aser English in Diploma Course (mesüra Diploma Course nung English ya subject ka ama magira Intermediate/ Matriculation nung) nung marks 50% ngur alitsüla.

MESÜRA

Central, State aser UT ajanga recognise süa aliba Education Boards nungi Physics aser Mathematics aliba Two years Vocational Course aggregate marks 50% aser English in Vocational Course (mesüra Vocational Course nung English ya subject ka ama magira Intermediate/Matriculation nung) nung marks 50% ngur alitsüla.

2. Science Subjects dak alaka.

Central, State aser UT ajanga recognise süa aliba Education Boards nungi Intermediate/ 10+2/ Equivalent Examination nung aggregate marks 50% aser English nung marks 50% nung ngua pass sür alitsüla.

MESÜRA

Central, State aser UT ajanga recognise süa aliba Education Boards nungi küm ana Vocational Course nung tajemba agi aggregate marks 50% aser English in Vocational Course (mesüra Vocational Course nung English ya subject ka ama melira Intermediate/Matriculation nung) nung marks 50% ngur alitsüla.

Temetettsü : Science Subjects examination (Intermediate/ 10+2/ three years diploma course in engineering mesüra two years vocational course with non-vocational subjects of Physics and Maths densema) atema temsüa aliba candidates tema Other than Science Subjects asoshi temsütsü aser online registration forms agütsüba mapang khen nung Science Subjects aser Other than Science Subjects examination agütsütsü maongka agütsütsü.

Registration & Examination Fee: Rs. 550/- plus GST.

ENTRY LEVEL QUALIFICATION, MEDICAL STANDARDS, TERMS & CONDITIONS, INSTRUCTIONS FOR FILLING UP ONLINE APPLICATIONS ASER REGISTRATION FOR AGNIVEERVAYU INTAKE 02/2026 ATEMA OSANG TEJANGJA <https://agnipathvayu.cdac.in> NUNG ANGUTSÜ



CBC 10803/11/0006/2526

Osangtsüsang aser registration of application atema QR code scan süang

Arsenal aser Martin tenangzüktepba yangluogo



Chiteni/July 6, 2025 (Agencies): Arsenal-i Real Sociedad nungi Martin Zubimendi pound million 60 shi agi alizükogo.

Spain nunger midfielder ya summer transfer window nung Arsenal-i alizükba asayar tanabuba kümogo. Parnoki Chelsea nungi goalkeeper Kepa Arrizabalaga pound million 5 agi alizüka liasü.

Arishi küm 26 taina asayar shibai taoba küm lemluwa Liverpool puri pa alizüktsü merangba magizüki liasü, pa

Real Sociedad nungi anitetba asayar ka lir.

Midfielder shibai Sociedad nungi 236 ben asayaba mapang goal 10 idaktsür lir, pai küm pongu atema tenangzüktepba yangluogo.

"Iba ya kü indang career nung kanga tongtibang mapang ka lir. Ni iba atema tongya ata liasü. Na iba club nung tetsüng ajemokba mapang nungi club ya koda tulu aji yimdangi arur," ta Zubimendi-i ashi.

"Ni Arsenal nung dennüa

liasü kechiyong parnok asayaba yimya ya kü atema tapet lir. Parnoki tawa parnok dak tashi aliba sayuogo aser tajungtiba arutsü anüngdaka lir," ta paisa shisem.

Taoba season Europa League nung Manchester United goal 4-1 agi Sociedad tsükdaktsüba team nung Zubimendi densema liasü.

Euro 2024 nunga pai Spain team nem teyari agütsüogo. England den final asaya nung pa Manchester City asayar Rodri melena aita liasü.

Pai linük tenüng nungi 19 ben asayar lir aser Rodri yirur masayatetba mapang pa Spain tem nungi asaya ajak nung asaya aruogo.

Zubimendi-i tawa Portugal den Nations League final asayaba mapanga goal idakja liasü.

Kasa mapang nung Arsenal-isa, Brentford nungi midfielder Christian Norgaard pound million 10 agi alizüktsü mulunga agizükogo.

United-i Leon aser Marseille-i Gomes alizükogo

Chiteni/July 6, 2025 (Agencies): Manchester United-i lanur defender Diego Leon den tenangzüktepba ka yangluogo, saka pa züngoksemtsü atema temelaba atadar, ta United-i Honibarnü metetdaktsü.

Paraguay nunger youth international asayar ya par linük nung Cerro Porteño nungi tang United-i ogo.

Leon ya taküm April ita arishi küm 18 jungogo. Pa Manchester nung asaya tenzükba mapang first team aser Academy napronglai teyari agütsütsü.

Kasa mapang nung England nunger midfielder Angel Gomes, France club

Marseille nung denogo. Pa Ligue 1 club Lille nungi asaya liasü saka tenangzüktepba yanglur aliba tembangba sülen tang-i ogo.

Roberto de Zerbi-i aniba Marseille team-i arishi küm 24 tain asayar ya alizüktsü atema mulunga agizükogo, shibai May ita pai Lille toktsütsü ta shir liasü.

Gomes ya England senior team nungi mezügbuba taoba küm interim manager Lee Carsley kübok asaya liasü, saka coach tasenba Thomas Tuchel lenisüba nungbo khien danga masayai lir.

Midfield asayar ya Manchester United nung

asaya-a tenzük, saka tetoktepba ajak nung terben dang asayaba sülen pa 2020 küm toktsür ao.

Pa taoba season pezü Ligue 1 nung asayaogo. Pa mezügbuba Portugal nung Boavista-i loan nung yoka liasü. Lille nungi asayaba mapang pai asaya 134 nung goal 10 idaktsü aser assist 19 süja liasü.

Marseille nung pa taoba mapang United team-mate Mason Greenwood den longjemtsü. Marseille pur taoba season Paris St-Germain sülen tanabuba jenjang nung tembang aser parnok taruba season Champions League asayatsü.

Canada Open: Srikanth semifinal nung tsükogo

Chiteni/July 6, 2025 (Agencies): India nunger badminton asayar Kidambi Srikanth-i Canada Open Super 300 badminton tournament nung kanga junga asaya-a atu saka semifinal nung Japan nunger asayar Kenta Nishimoto mekokteti tsükogo.

Semifinal asaya nung Nishimoto-i asaya ya 21-19, 14-21, 18-21 ta kanga toktepba asayar koka liasü.

Srikanth-i asaya kanga tashi ita tenzük aser

mezügbuba asaya 21-19 agi akok, saka Nishimoto-i telangzüba tajung agüja tanungba asaya ana ya atonga koka liasü. Tena tsüngda ghonda ka ser minute 18 asaya liasü.

Deciding asaya nung asayar ana ya point 18-18 ta aliba mapang Srikanth-i court adena shuttle anaben tashi züktokba sülen Nishimoto-i asaya koka liasü.

Iba asayamung quarterfinal asaya nung

Srikanth-i world number six asayar Chou Tien-Chen 21-18, 21-9 agi koka liasü.

Kasa asayamung nung S Sankar Muthusamy Subramanian-ia kanga meranga asaya saka quarterfinal nung Nishimoto 15-21, 21-5, 17-21 agi makok. Tetsür kija asaya jung Shriyanshi Valishetty-ia kanga junga asaya saka la quarter nung Denmark tsür Amalie Schulz-i tsükdakja liasü.

Mezügbuba Dr. T Ao Junior (Girls) National football C'ship ayonger

Dimapur, Chiteni/July 6 (TYO): Mezügbuba Dr. T. Ao Junior girls National Football championship taküm November ita tanabuba hopta asayatsü.

July 2 nü New Delhi nung All India Football Federation (AIFF) executive senden amenba mapang iba telemtetba ya agia liasü.

2024 küm September ita

AIFF-i Junior National Girls Championship nüngja ya Dr. T Ao Junior (girls) National football championship ta ajatsü telemtetba agia liasü.

Indian Olympic Football Team indang mezügbuba captain Dr. T Ao nem tetushi agüja AIFF-i iba telemtetba ya agi, shibai India nung football asaya terenlok atema teyari tulu agüja liasü.

KCK auction nung Sanju Samson sen timba agi alizük



Chiteni/July 6, 2025 (Agencies): Kerala nunger nüngtugu cricket asayar Sanju Samson, Kochi Blue Tigers-i otsü tasen ka yaglua sen lakh 26.60 agi alizükba sülen pa tang mezügbuba Kerala Cricket League nung asayatsü lir. Pa ya tang tashi nung sen timtiba agi alizükba asayar kümogo.

Samson shiba base price lakh 3 nung züngoksema liasü, pa atema bid ya yakta dang lakh 5 aküm aser iba sülen 10 aküm. Maneni club tem tsüngda pa atema bid sütepba sülen Kochi-i pa alizük, shirnoki parnok indang INR 50 lakh purse tesadang dak tema intoka India team wicket-keeper ya alizükogo.

2024 küm Wayanad nung preparatory camp nung shilem magitetba atema Vijay Hazare Trophy team nung mezügbuba sülen Samson ya tang mezügbuba Kerala Cricket Association (KCA)-i achayangba asayamung ka nung asayatsü lir. Taoba küm Kerala team Ranji Trophy final-i mezügbuba ai aser Vidarbha

sülen tanabuba jenjang nung tembanga liasü.

International asayamungtem dak rangloker asayatsü atema taoba küm iba league mezügbuba asayaba mapang Samson-i shilem magitsü telemtetba agi. Pa iba league indang brand ambassador ama sangdonga liasü saka pai shilem magi.

Taoba küm Samson-i India tenüng nungi kanga junga asaya-a pai Bangladesh aser South Africa na den asayaba mapang innings pezü nung century asem yanglua, küm ka nung T20I asaya nung century asem yangluba mezügbuba asayar aküm. Samson ya tatemsa 2025 season nung Rajasthan Royals nungi asayaba nguogo. Iba asayamung nung pai run 285 yanglu.

Sen timtiba agi alizükba asayatem rongnung Samson indang Kerala teammate Vishnu Vinod tanabuba jenjang nung lir. Pa ya Aries Kollam-i sen lakh 13,8 agi alizükogo. All rounder tejen Jalaj Saxena, shiba Kerala team nungi asayar, pa Alleppey Ripples puri sen lakh 12.4 agi alizükogo.

BILEMDANGANG

Nisung ajak pei shilem inyaktsü yanglu.